

MARIACHI ORGUYO DI ARUBA A HACI UN COS CU GIRA DEN CARIBE

ORANJESTAD [AAN] Mariachi Orguyo di Aruba a caba di regresa for di nan gira den Caribe. For di Puerto Rico nan a bai Miami pa bai duna presentacion na Nassau, Freeport, Cuzumel, Cancun, Gran Cayman, y Montego Bay.

E presentacion mas grandi tabata na Cozumel Mexico, unda cu Mariachi Orguyo di Aruba a presenta na e Festival Grandi dilanti di mas cu 12.000 persona riba Plaza Juarez. Ey ta caminda Mariachi Orguyo di Aruba a acompaña e famoso bailarin mexicano Paco Suarez, cu ta un bailarin profesional cu ta biba na Los Angeles. Paco Suarez a baila bao di e ritmo di tumba titula "Aruba Mi Prenda Querida" toca pa Mariachi Orguyo di Aruba, y esaki tabata algo sensacional. Paco Suarez a puntra e publico ta cual parti di Mexico e Mariachi aki ta? Tin cu a bisa di Guadalajara, otro a bisa di Merida y asina a sigui menciona diferente parti di Mexico. Ora cu Paco a bisa nan cu e Mariachi aki ta bini di Aruba, nan a puntra ta cual parti di Mexico esey ta, anto e ora ey Paco Suarez a splica nan cu Aruba ta keda 15 milla for di e costa noord di Venezuela. E ovacion na e momento ey tabata mas grandi ainda.

E mariachinan mexicano a keda masha asombra cu na Aruba un isla asina retira di Mexico tin un mariachi cu por toca nan musica asina bon. Tur e espectaculonnan aki a worde graba riba video cual lo ser pasa na diferente parti di mundo como promocion turistico.

Sr. Pablo Kelly lo bai trata pa haya e video aki pa pase na TeleAruba pa e pueblo di Aruba por mira con Aruba a ser representa dilanti di 12 mil personas ri'ba Plaza Juarez na Cozumel, Mexico.

Mariachi Orguyo di Aruba a haya contrato pa un (1) aña na Los Angeles, pero lastima cu esaki no por a worde acepta debi cu tur e componentenan di



Mariachi Orguyo di Aruba tin nan trabao y famia aki na Aruba, sin embargo a keda combini cu Mariachi Orguyo di Aruba lo bai Los Angeles pa dos siman. E organizadornan lo bai haci e preparacionnan necesario mientras e componentenan di Mariachi Orguyo di Aruba tambe

mester haci nan liber sea cu vacantie of permiso di nan doño di trabao pa nan por viaha ora cu e tramitenan keda cla.

Aki na Aruba Mariachi Orguyo di Aruba ta hopi ocupa cu dos festival grandi na su encargo e aña aki, cu ta e Festival Grandi di Aruba cu lo tuma lugar dia

31 di Augustus y e Festival di Aruba/Antillas cu lo tuma lugar dia 14 di September den Caribbean Hilton Hotel na Corsow. Fuera di esaki nan mester cumpli cu nan contratonan

di hotel y toca na ocasionnan familiar. Mariachi Orguyo di Aruba lo sigi traha duro pa asina representa nos dushi Aruba cu lo ta satisfaccion di mas grandi di e culto pueblo arubiano.